Severin, qualli li ha fati condur presoni in campo. Nota, dito locho di Montorio per la Signoria nostra li fo dato, per pregadi, al prefato domino Piero Antonio Bataja, a conto di la promisiom fatoli, perchè era castelan di la rocha di Cremona et si rese.

Di Vicenza, di sier Vetor Capello, prove-

dador, date a dì 2, hore 17. Come, justa i mandati di la Signoria nostra, et per letere di provedadori zenerali, è andato lì, a tuor il possesso come provedador; et governarà, justa le forze sue etc. Item, zercha vituarie, che il bisogno dil campo trova dificultà, per non esser animali che conduchi, et per il morbo è de lì; per le qual do cosse vede gran 129 disturbo, pur vederà di far el possibele di mandarne, e cussì a remediar al morbo. Item, a quella camera et de lì non è cavalari; adeo, con il cavalo medemo l' è venuto, à convenuto mandar le presente letere vien di campo, el qual cavalo era stracho, ma non à 'uto per altri chi mandarle. Et à ricevuto nostre letere; e farà far dil pam, justa il poter suo, in quella orfana cità.

Dil capitanio di Po, date a la Pelosella, a dì 2, a horre una de dì. Avisa il suo zonzer lì, e aver parlato con fra' Lunardo, e inteso le zente dil papa voler far uno ponte al Bonden e pasar Po e redursi a Caxaglia; sì che hanno terminà tra lhoro, indusiar a far il ponte per ozi, per saper il vero. Item avisa, li contadini di Pontichio si duol esserli stà fati molti damni per li nostri; unde lui capitanio à electi XX homeni di le ville, e li fanno star al passo di Pontichio, et non lassino passar niun con butini senza suo boletin. Item, che fra' Lunardo et Meleagro da Forlì è lì, et hanno mandato spie.

Dil dito, di horre 17. Come ha recevuto nostre letere, debbi star vigilante a far il ponte sora Po, se prima le zente dil papa non siano pasate; e cussì aspeterà a farlo per ozi. Et quanto a la letera li fo scripto, che à 'uto sinistro l'armata, quando l'era a Crespim, scrive che solum tre cavali di ballestrieri rimaseno di là di Po, quali, per il fradello di Maxino dal Borgo, venuto con quelli cavali versso il ponte, forno uno morto et do fati presoni, nè altro damno si ave.

A di 4 septembrio. In colegio. Fonno compito di lezer le letere venute eri sera. Poi lecte le notade di sopra, fonno lecte le intercepte, tradute, il sumario è questo; et la zifra di Antonio di Trento, qual chiama veneti, rustici, e il papa dubium. Et cætera, ut patet in ea.

De l'imperador fo leto una letera, data a Jurich, a di 21 avosto, drizata a monsignor

principe de Aynalt; item una altra, drizata a monsignor di Plesis, di 24. In conformità. Come sguizari vieneno a Belenzona, contra la duzea de Milam; e lui imperador à fato, che diti sguizari farano una dieta. Et manda inclusa una letera di diti sguizari.

De sguizari una letera, scrita per quelli capi, data a Turich, drizata a l'imperador. Li scriveno, come sono in acordo con il papa e aviati in suo favor; e si scusano. Et farano una dieta questo San Bortholamio.

De l'imperador una letera, scrita a Nazaret, a di 18 avosto, al ducha di Savoja. Lo prega non dagi passo a sguizari.

Dil principe di Aynalt, data a di 14, in campo, drizata a l'imperador. In recomandatiom di domino Zuan da Porto, cavalier vicentino, fidelissimo a l'imperio, qual vien in Alemagna, et lo ricomanda a la sua cesarea majestà; e nomina Casimuro, marchexe di Brandiburg. E scrive, i merchadanti venitiani nostri nimici, con altre parole; ma questo è il sumario di la letera.

De l'imperadar, date a di 21, al principe 129° di Aynalt. Come si lievi, et brusi le porte di Vicenza, Marostega e Bassam, e fazi dar piezaria.

Del dito, di 24, date a Pernech. Scrive, come è zonto lì uno orator dil re di Hongaria; e che 'l dito re sarà in liga con lhoro. Item, sguizari è partiti, rimasti li grisoni. Item, come la dona dil signor Constantin Arniti, qual è venuta in Alemagna, à portà danari a' sguizari; e che lui non à voluto far mal al dito signor Constantin, perchè li de' salvoconduto.

Di uno Jacomo di Banixi, date a Yspurch, a dì X avosto. Scrive al gran maistro di Milam. Item, mandano una poliza dei mia fino a la Livenza tutto.

Dil ducha di Ferara, al principe de Aynalt, date a la Bastia, a dì 13 avosto; è letera di credenza. Come manda Marco Antonio Antimacho a star a presso di soa signoria in campo.

Item, in dite letere e scriture erano altre letere, ma non da conto; ma ben li ordeni dil campo, in todesco, qual, fati translatar in latin, fonno mandati a li provedadori zenerali, et la copia sarà qui avanti posta. E nota, dite letere in todesco erano translatade per uno

Dil governador zeneral nostro, fo leto una letera, drizata a sier Nicolò da Udene, suo canzelier, data in campo, a San Martim, a dì 2. Scrive tutti li successi dil campo, come si ha inteso